

P4:
K65,000 bilong Kamkumung...

P14 -15:
Wol nius long poto



P16 -17: **Laipstail NCD Gavana putim han i go ausait long Sentral Provins...**



Tupela moa wik...

EM BAI OP: Dispela K1.2 milien wara wel bai ol long tupela wik taim, Gavana bilong NCD, Powes Parkop long Trinde i go sekim wok bilong ol kontrakta na tokim Wantok Niuspepa olsem, dispela wok sapos long pinis long Krismas na Niu Yia long amamasim ol manmeri na pikinini, tasol ren i bagarapim olgeta wok na dispela bring taim bilong pinis i kam longpela taim liklik. HG Quarries i go pas long wok wantaim lukaut bilong sif enjinia husat i kam long Saina, we ol tasol save long putim dispela kain samting, ol lain long NCDC i fandim dispela projek. Dispela wara wel Papua Niugini bai mekim nem long en long wanem yumi tasol i gat insait long Pasi-fik.
Poto - Nicky Bernard

Ol sinia Difens opisa baim ol yet moa long K90,000...

SAMPELA wok hait ripot long wok fainens bilong Difens Dipatmen i soim Ekting Difens Sekretari, Billy Porykali na tupela arapela opisa, i yusim K92,232.90 long baim ol yet namel long Me na Disemba, 2010.
 Tupela arapela opisa em brata bilong Mista Porykali, David Porykali husat i Deputi Sekretari na Jeffrey Alowak, wanpela sinia opisa long Difens Dipatmen.
 Long dispela mani, ol ripot we Wantok Niuspepa i kisim, i soim Billy Porykali i kisim K20,816.14, David Porykali i kisim K34,718.35 na Alowak i kisim K36,698.41.
 Repot long akaun i soim i nogat gutpela as long dispela tripela ol opisa i yusim mani long baim ol yet.
 Bikos long dispela ol toktok askim nau i go long Difens Minista long em i saspending tripela ol opisa, makim

ol ekting opisa na kamapim wanpela inkwairi long mekim wok painim.
 Wantok Niuspepa i givim dispela ripot long Difens Minista, Bob Dadae, na i askim em sapos em i save, bai mekim wanem samting long dispela ol opisa tasol i no kisim bekim long taim em i go long prin.
 Sapos inkwairi i kamap dispela bai namba tu inkwairi bihainim namba wan inkwairi we i kamap na i mekim wok painim long saspended Difens sekretari, Fred Punangi.
 Wanpela mausman bilong Difens Dipatmen i tok pasin dispela ol opisa i mekim i no stret.
 Em i tok paul pasin ol opisa i mekim i as bilong sampela ol hevi we Difens Dipatmen na Fos i wok long bungim long dispela taim.
I go moa long pes 3

Talk For 11 toea All Day and All Night!

I talk long and pay less with Digicel!

Call your friends on Digicel or their land lines and talk for one minute at the normal rate, and the rest of the call will cost you only 11toea per minute.

Digicel
 PNG's Bigger, Better Network.

Digicel Terms and Conditions apply. Applies to Digicel prepaid customers only. For more information call Customer Care free on 123

OX & PALM
 Since 1936

Em i liklik prais tu!!

I stap klostu long stua bilong yu...

Rait abus!

OX & PALM PORK LUNCHEON MEAT
 NET WEIGHT 190g

OX & PALM PORK LUNCHEON MEAT
 NET WEIGHT 340g

ANZ eGate helpim MRA long lonsim onlain stua bilong em

PAPUA Niugini Minarel Risoses Atoriti (MRA) long Trinde 12 Januari, 2011 wantaim helpim bilong ANZ eGate i lonsim nupela onlain stua bilong em.

Dispela teknoloji bilong ANZ i helpim MRA long mekim peimen i go long ol onlain kastoma taim em i yusim kredit kad.

Kain sistem i givim fridom long kastoma long baim samting long wanem karensi em i laik yusim long em.

ANZ PNG na Not Wes Pasifik Sif Eksekutiv Opisa Vishnu Mohan i tok onlain ritel i kamap olsem wanpela bikpela hap bilong mekim mani long wol na ANZ eGate i helpim ol kastoma bilong ANZ long yusim dispela sistem.

“Dispela prodak i gutpela long yusim long kainkain wok bisnis na mipela i lukluk long moa bisnis manmeri long kam yusim,” Mista Mohan i tok.

Dispela sistem i mas lukim moa namba bilong ol kastoma i kamap na yusim long baim ol samting.

MRA ekting Menesing Dairekta Philip Samar i tok MRA i amamas long lonsing bilong dispela sistem em i ken mekim wok bilong em na ol arapela husat i wok wantaim em i kamap isi.

MRA onlain i save salim ol jiolojikal mep, jiografikal na jokemistri data na ol arapela intel pablikesen.

Maski dispela i liklik, mipela bai mekim bikpela maket bilong mipela we dispela bai lukim mipela i salim ol arapela samting olsem T'set na ambrela wantaim ol pepa, jonel na buk mipela i raitim,” Mista Samar i tok.

Em i tok MRA i lukluk tu long wok bung wantaim ANZ long mekim bikpela dispela sistem we bai kisim ol arapela wok olsem peimen long onlain sevis, edministretiv na ol arapela stetutori fi olsem tenement aplikesen fi.

MRA i namba tu oganaisesen long yusim ANZ eGate long PNG; namba wan em Datec we ol i yusim olsem pailot projek long Epril las yia.

Lons bilong dispela MRA pro-



TRAIM PASTAIM: MRA Menesing Dairekta Philip Samar i traim nupela trenseksen masin wantaim ANZ kredit kad we ANZ i givim.

dak i bihainim wok stretim we i kamap long Lae Siti brens long Lae, Morobe Provins i no long-

taim i go pinis. ANZ i gat 13 brens, 50 ATMS, moa long 500 bisnis wantaim 900

teminel bilong ol EFTPOS na i gat moa long 500 wok manmeri long kantri.

PNGIMR i lonsim Intenel Kompetiv Risets Awod Skim

PAPUA Niugini Institut bilong Medikol Risets (PNGIMR) i lonsim namba wan Intenel Risets Awod Skim bilong em.

PIP aninit long Nesenel Gavman i givim mani long dispela skim wantaim mani mak bilong K1 milion long wanwan yia.

Dairekta, Profesa Peter Siba i givim lukave na tok amamas long

gavman long gutpela sapot em i givim long mekim wok painim ol sik na hevi i kamap long laipstail bilong ol manmeri.

Bikpela tingting bilong PNGIMR em long karimaut ol wok painim i pas long helt bilong ol manmeri, na painim ol rot long pasim dispela ol sik long i no ken kamap.

Olsem wanpela oganaisesen bi-

long gavman bilong PNG, Institut i save kisim bikpela helpim bilong em long Nesenel Gavman, wantaim AusAID.

Inap olsem 70 pesen bilong anuel baset i save kam long ol oganaisesen ausait long insitut yet na sinia menesmen i lukluk long mekim bikpela dispela mak long ol yia.

Long givim luksave long dispela bikpela wok bilong PNGIMR, gavman bilong PNG i givim olsem K1 milion long go insait na mekim wok painim long 2011.

Bikos long dispela, sinia menesmen i kamapim wanpela intel, kompetetiv risets awot skim (PNGIMR ICRAS Progam).

Tupela kain rot em mani bai go long em:

K300,000 olsem gren mani long ol lain manmeri husat i stat o i stap long namel pinis long mekim wok painim; na

K700,000 long ol bikpela wok painim i go long namel, na sinia risetsa.

Saintifik Riviu Komiti i kamap long lukim dispela kain skim.

Projek bilong ol skim bai:

- **HELPIIM** ol nupela na namel PNG saintis ol i kisim moa save long mekim wok painim disain na lidasip;
- **KARIMAUT** stadi we go wantaim long as tingting bilong PNGIMR long luksave long ol nupela hap bilong mekim wok painim; na
- **HELPIIM** long kamapim nupela rekot bilong raitim ol pepa o buk.

Risets awod skim bai sapotim operesinel, baiomedikol, klinikel, bihevriyel, fil na lebrotari-bes risets projek long olgeta sait.

Profesa Siba i tok dispela saintifik, teknolojikel, sosel na ekonomikel risets i bikpela ol samting long bungim tingting bilong Visen 2050.

“Mi amamas long Nesenel Gavman long kamap wantaim dispela tingting long givim mani stret long karimaut wok painim long kantri,” em i tok.

Mi pasin save bagarapim komyuniti

PLANTI hevi long wol i kamap bikos long mi pasin bilong man.

Wanpela man o meri i laik kisim moa long narapela o wanpela komyuniti o kantri i laik kisim moa long arapela.

Ekting Praim Minista Sam Abal i mekim dispela tok long Krismas na Nu Yia toktok bilong em.

“Long mi yet na long mi olsem lidaman, yia 2010 i bin wanpela ol yia we i gat planti traim.

“Planti manmeri na kantri i askim ol yet taim hevi bilong mani i kamap long wol.

“Trupela samting em olsem i nogat wanpela samting i gat asua. “Dispela i kamap bikos ol manmeri i laik bihainim mi pasin.” Em i olsem wanpela kantri i laik kisim moa na larim ol arapela kantri i kisim taim.

“Em i laik kisim moa, na i no laik bekim dinau na hevi bilong winmani bilong dinau mani nau i kik bek na kisim em,” Mista Abal i tok. Em i tok man i no inap long balensim ol buk bilong em. Hevi bilong mani i kamap bikos man i kisim dinau na winmani bilong dinau i bikpela moa long mak bilong mani man i kisim long em.

Mi pasin bilong man i lukim wanpela bikpela hevi we man i bungim long laip bilong em long graun: Hevi bilong klaimet senis.

Moa long planti handret yia, man i mekim ol samting wantaim wanpela tingting tasol: long kisim ol samting long graun na lukim em i kisim olgeta samting. Em i katim ol diwai moa long graun yet i kamapim. Em i kamapim planti paia we win yet i no inap stretim.

Wantaim mi pasin em narapela samting we i pas tru long pasin bilong man: Bikhet, no laik save.

Abal i tok long taim man i stat long luksave long klostu long pinis bilong 1980s long wanpela hevi i bagarapim laip, man i traim long pasim tasol i leit pinis.

Wanpela hap long arere bilong graun i kamapim ples we hat bilong san i go insait na kukim ais. Dispela i mekim ais i bruk na pulumapim solwara, solwara i solap na karamapim ol nambis na liklik ol ailan.

OXFORD, TOK PISIN INGLIS DIKSENERI

Katim, na pulimapim oda fom daunbilo na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Inglis, o Inglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

TITLE	ISBN	PRICE (inc GST)	QTY	SUBTOTAL
PNG Tok Pisin English Dictionary	9780195551129	K38.50		
				TOTAL K
				PLUS FREIGHT* K
				GRAND TOTAL K

*Freight cost for one book: K5.00 across PNG, K10.00 Solomon Is, K13.50 rest of Pacific, K15.50 rest of the world

Options for Payment
1) Direct deposit into Bank Account (details below)
2) Mail Cheque to Word Publishing Company Ltd, PO Box 1942, BOMBOKI, PNG
3) Call into the office: OFFICE, Section 58 Alakua Road, Wagaia Dr, HCD

Account Name: Word Publishing Company Ltd
Account Number: 100 000 5380
Bank: Bank of South Pacific Ltd
Branch: Commercial Centre
Branch Code: 8951
Swift Code: BOSPPGPM

FAX BACK TO : (675) 325 2579
If you are ordering more than one copy please contact us first via phone.
Phone: (675) 325 2580
Fax: (675) 325 2579
Email: word@wantok.com.pg

Name (print): _____ Phone: _____
Address (print): _____

Fax: _____
Email: _____ Signature: _____

Luk olsem Ogio i nupela GG

Paul Zuvani i raitim

TUMORA 10 kilok moning Papua Niugini bai save husat i nupela gavana jeneral. Tasol pastaim long nem tru i kamap planti ai nau i stap long Minista bilong Haia Edukesen na Memba bilong Not Bogenvil, Michael Ogio, long winim dispela sia.

Mista Ogio i kendidet bilong gavman long resis long dispela sia.

Inap long aste avinun ripot i tok olsem 49 sain nem bilong ol Memba bilong Palamen i stap baksait long nem bilong Ogio.

Wantok Niuspepa i traim long kisim nem bilong ol arapela kendidet husat i winim mak long kamap olsem kendidet long resis long dispela sia tasol i no inap long kisim long opis bilong Klak bilong Palamen, Don Pandan.

Wanpela lo long ol kendidet i inapim mak long kamap olsem kendidet long resis long dispela sia em olsem 15 memba bilong palamen i mas endosim ol.

Ol manmeri husat i kisim namba aninit long dispela namba i no kisim mak na olsem bai i no inap.

Sapos i win dispela bai lukim em i



WAS STAP: Ogio, Minista bilong Haia Edukesen.



KIAP: Givim luksave long ol arapela.

kisim ples bilong Se Paulias Matane.

Se Paulias i pinisim taim bilong em long kamap gavana jeneral tasol gavman i makim em gen long kamap gavana jeneral long las yia Jun.

Tasol ol kendidet husat i resis wantaim em i tok Palamen i no bihainin lo na i no pinisim olgeta rot bilong ileksen bipo long ol i tokaut long Se Paulias long em i kamap gavana jeneral gen.

Ol kendidet i kisim dispela tok i

go long kot.

Suprim Kot i skelim Palamen i asua long rot bilong makim gen Se Paulias na olsem em i givim oda long Palamen long las yia Disemba long em i mas holim kibung insait long 20 de na ilektim nupela gavana jeneral.

Long dispela as ileksen bilong tumora i mas kamap.

Wantaim Ogio olsem kendidet i gat ol arapela nem we i pairap tu olsem Sekretari bilong Nesenel Eksekutiv Kaunsil (NEC) Winnie Kiap, Se Makena Geno na Ennie Moitz.

Abal: Ol sekta mas kamapim senis

Paul Zuvani i raitim

EKTING Praim Minista Sam Abal i askim olgeta sekta, Dipatmen na ol Atoriti, long ol i mas kamapim ol rot long mekim senis long bungim tingting bilong Visen 2050.

Em i tok em i wanpela samting na igutpela ol ejensi i kamapim ol plen tasol ol i narapela samting long ol i kamapim ol rot long lukim ol plen i wok.

Mista Abal i mekim dispela tok long taim em i givim tok long ol minista na sekretari, direkta na komisina bilong ol ejensi long Crowne Plaza Hotel long las wik Fraide.

Kibung i kamap bilong wanwan ol ejensi, moa long ol bikpela oganaisesen olsem Dipatmen bilong Fainens na Tresari, Plening, Edukesen na Helt i tokaut long ol rot i gat long karimaut plen bilong ol.

Gavman i kolim dispela yia, 'Yia bilong Implemente-



ABAL: Laikim senis.

sen o Karimaut Wok,' na olsem bihain long wanwan mun em bai rivium wok bilong wanwan ol oganaisesen sapos ol i karimaut wok bihainim plen bilong ol o nogat.

Em i tok bihainim kamap bilong Visen 2050 long 2009, PNG Developmen Stratejik Plen 2010 i go long 2030 na Midium Tem Developmen Plen 2011 i go long 2015, planti wok rivium nau i wok long kamap long Dipatmen bilong em long dispela ol plen.

Na bikpela samting em i laik lukim em long karimaut 2011 Mani Plen.

Em i tok olgeta opis long Januari i go i mas stat karimaut 2011 Mani Plen.

Na long dispela em i sirigautim kibung long Crowne Plaza Hotel long lukim Nesenel Plening Komiti i tokaut long ol rot bilong karimaut Mani Plen bilong dispela yia.

"Mi save olsem bikpela samting kantri i laikim na ol investa i laikim em stabiliti.

"Mi laik tok stret olsem gavman i stap yet na olgeta samting bai ron gut.

"Stabiliti i bikpela samting na i mas stap long dispela taim we kantri i redi long kamapim LNG projek we bai statim wok long 2014.

"Long wankain taim mi luksave long tingting i stap bilong putim dispela ol plen bilong gavman wantaim bai olgeta i ron gut long bungim Visen 2050, Stratejik Plen 2030 na Midium Tem Developmen Plen."

ol sinis difens opisa baim ol yet moa long K90,000

I kam long pes 1

"Wari mipela i gat em mipela i gat ol ami opisa husat long las Disemba na nau long dispela mun, nu yia i kam askim long austending mani bilong ol tasol i no kisim.

"Sampela mani i no moa long K500. "Bilong wanem i nogat gutpela as long dispela ol opisa i baim ol yet nating taim ol ami opisa i mekim wok tasol i no inap kisim pe?" dispela mausman i tok.

Em i tok sapos wanpela wok painim i kamap i mas tokaut klia long asua bilong dispela ol opisa.

"I mas gat mekimsave long dispela ol opisa.

"Moa yet nogat gutpela pepa wok bilong soim ripot bilong mani long planti ol yia.

"Ol samting long opis bilong Difens opis i stap nabaut.

"Ol hevi i kamap nau long Difens Fos i kamap bikos long kain ol paul pasin i stap.

"Mipela i askim Difens Minista long em i mas saspending dispela ol opisa, makim ol ekting opisa na kamapim narapela inkwairi na mekim wok painim long ol," dispela mausman i tok.

PNG Gavman givim K10 milion long Australia long helpim ol manmeri i kisim bagarap

EKTING Praim Minista Sam Abal i tokaut long aste olsem GAVMAN bilong Papua Niugini i givim inap olsem K10 milion long ol manmeri husat i kisim bagarap long bikpela tait long Australia.


Bikpela ren nau i kamap long tupela stet (provins) bilong Australia, Kwinnslen na Nu Saut Wels.

Na long Westen Australia bikpela paia i kamap na kukim ol bus.

Long taim bilong givim Mista Abal i tok dispela helpim i makim sori PNG i givim long ol lain manmeri husat sindaun bilong ol bagarap bikos long hevi bilong ren na paia.

Abal i raitim pas pinis long Praim Minista bilong Australia, Julia Gillard, long helpim PNG i givim.

Dispela helpim i makim tok



BAGARAP: Australia kisim bikpela bagarap long haiwara na paia.

tenk yu long ol helpim Australia gavman na ol manmeri bilong em i givim long taim bilong ol wok kamap na hevi.

"Mipela i sori tru long lewa bilong mipela long dispela taim nogut.

"Australia i stap yet olsem gutpela na bikpela developmen poroman bilong PNG na olsem

PNG i no inap long lus tingting long em.

"Laikim na helpim Australia i gat long PNG em PNG i laik mekim wankain long Australia.

"Dispela helpim i soim olsem Australia i poroman na wantok bilong mipela," Abal i tok.

Em i tok PNG i kisim tok long Gilliard olsem Australia inap

long helpim em yet tasol i tok PNG i stap redi long givim ol arapela helpim sapos Australia i askim.

"Inap long tripela wik nau mipela long PNG i wok long lukim, harim na ridim long nius long hevi bilong ren na paia i wok long kamap long Australia.

"Inap long aste avinun 12-pela laip i lus pinis long dispela hevi na PNG i no inap sanap na lukluk tasol.

"Long makim maus bilong gavman na ol manmeri bilong PNG, mi salim tok sori bilong mi i kam long ol manmeri bilong Australia husat i bungim dispela hevi.

"Moa long dispela mi save planti Papua Niugini manmeri i stap long Australia na olsem mipela i no kisim toksave long ol hap we ol i stap long em nau," Abal i tok.

Nestlé MILO

KAMAPIM CHAMPION BLO YU!

THE ENERGY FOOD DRINK

Actigen-E

200g NET

Go long mumu..



PIK BILONG MUMU
TAIM bilong marit long ples Fangalawa long Nu Ailan em i taim bilong bikpela kaikai we i gat planti pik, taro, kaukau na banana. Tupela brata Cliff na James Tamaliu i karim wanpela pik bilong go redim bilong mumu. Tupela i wokhat tru long redi long marit bilong kandre meri bilong ol Charmaine wantaim man bilong em Pico Sition long Krismas De stret.
Poto: Kylie Choi



NESENEL KAPITEL DISTRIK KOMISIN PABLIK NOTIS

NAIT MAKET – GARAGE SEIL LONG 5 MAIL

NCDC i laik toksave long pablik manmeri olsem Komisn i traim wanpela nait maket progrem long Pot Mosbi. Olsem nau mipela i traim, mipela bai kamapim wanpela garage seil (but bilong kar seil) insait long 5 Mail Jack Pidik Pak i sap hapsait long Parkop Faunten. Plis bringim olgeta kago yupela laik salim olsem ol samting, ol henkraf na ol arapela samting. Mipela i askim tu ol baia insait long siti long yusim dispela sans long painim ol samting yu nidim insait long but bilong kar bilong ol arapela. NCDC bai no inap long makim prais. Em bilong baia na sela yet long tok wanbel long dispela.

Ol lain manmeri na bisnis i ken bringim ol dring (bia i tambu!!) na kaikai bilong salim.

Bai gat sekyuriti na ol lait i stap long dispela ples. Bai gat sampela ol muvi piksa bilong pikinini bai stap tu, olsem na yu ken bringim ol pikinini bilong yu.

Ples : 5 Mail Jack Pidik Park
De na taim : Fraide, 21 Janueri long 7 kilok i go inap 10 kilok nait.

Em i FRI, tasol husat i kam pastaim, bai kisim gutpela ples bilong salim samting.

Plis ringim Ned Gong long mobail telepon namba 72490094 (negg@ncdc.gov.pg) long painimaut moa.

Sapot bilong yu i stap long kamapim dispela nupela tingting; bai yumi ken bringim bek nait olsem taim bilong amamas na stap seif.

**Tok Orait i kam long Menesmen
“Narapela Gutpela Wok bilong Gavana Powes Parkop”**

Ol benk bilong Australia i glasim gut hamas ol bai sasim ol Pasifik Ailan manmeri

OL benk long Australia nau i wok long glasim gut hamas ol bai sasim ol Pasifik Ailan manmeri husat i save salim mani i go bek long kantri bilong ol.

Dispela rivi o wok glasim gut i bihainim wanpela ripot i kam

long Australia na Nu Silan Gavman, we i apinim ol benk i sasim moa long 20 dola long olgeta wan handret dola.

Ripot, em Pasifik Ailans Forum i bin askim long ol i mekim, i painim ol benk sas i kostim Pasifik moa

long 90 milian Australia dola long wan wan yia.

ANZ i tok, em i gat plen long bringim wanpela nupela debit kat long Australia, em pipel long Pasifik i ken go insait wantaim wanpela namba tu kat.

Namba wan Pasifik saiklon i hamarim Vanuatu

NAMBA wan saiklon long kamap long Pasifik rijen nau i hamarim pinis Vanuatu wantaim ol bikpela win, ren na taim nogut.

Saiklon Vania i kamapim pinis sampela bagarap long ol gaden kaikai, na ol i givim pinis tok lukaut i go long ol pipel bilong Erromango na Tanna long stap insait long ol haus bilong ol na harim redio long kisim ol nupela toksave long dispela taim

nogut.

Ol i ting dispela stom o taim nogut bai tanim i go long sautwes bilong Vanuatu na ron i go olsem long Nu Kaledonia.

David Gibsone, bilong Mitiorolojikal opis long Vanuatu i tok dispela stom inap go kamap long Kategori 2 stom taim em i ron i go long Nu Kaledonia.

Rot bilong Morobe bai stat long dispela yia

Bustin Anzu i raitim

MOROBE Provinsel Gavman i givim namba wan tingting bilong em long stretim olgeta han rot insait long provins long dispela yia.

Long 2011 baset bilong ol, ol i makim K29.2m long infrastraksa developmen.

Siaman bilong Fainens na Gavana bilong Morobe Luther Wenge, long baset toktok bilong em, em i tok infrastraksa developmen i kisim bikpela luksave long dispela baset. Ol gavman sevis mas i go long ol ples olsem na wanpela bikpela hevi bilong dispela provins, em rot. Olsem na

long dispela mani ol i putim, K12.7m em long stretim olgeta rot insait long provins.

"Infrastraksa Developmen i kisim bikpela long dispela baset. Long dispela K29.2m, K9.5 bai go long mentenens bilong ol dispela infrastraksa i stap pinis na K12.7m bai go long mekim ol nupela rot insait long provins," siaman bilong Fainens i tok.

Em i tok kain rot bilong Lae i go Finschaffen na Kabwum bai kisim K1m, Kasangare i go Bapi na i go long Garaina rot bai kisim narapela K1m na Kalangan i go Kasanombe rot bai kisim K500, 000 luksave. Narapela ol rot olsem Lae siti K2m na Aseki

Menyamyama rot i kisim K200, 000.

Lae siti rot i bin kisim luksave long Nesenel Gavman (K117m) olsem na Provinsel Gavman i no bisi tumas wantaim dispela na putim tasol K2m long helpim long wokim ol rot insait long Lae siti.

Siassi Hai Skul i no stap insait long dispela baset na nupela Wantoat Hai Skul i sot long K200, 000. Gavana Luther Wenge i bin bungim ol manmeri long Wantoat long las yia na promis long givim K1m tasol long dispela baset, ol i givim K800, 000.

Memba bilong Palamen bilong Siassi Vincent Michaels na Koni Inguan bilong Markham i no amamas long dispela na long taim bi-

long vot long pasim baset, tupela i no vot.

Long wankain taim tu, Meya bilong Lae siti, James Khay, i tok dispela baset bilong Provinsel Gavman inap kisim planti mani sapos ol i bihainim gut planti takis mani i stap aut yet.

"Provinsel Gavman i no wokim planti mani long wanem, planti mani i stap autsait yet.

Sapos ol i bihainim gut tru, ol inap long kisim planti, we stap aut yet. Mipela inap long skruim baset mani i go antap olgeta," em i tok.

Em i tok les pasin bilong ol manmeri bilong wok i mekim na ol i no kisim planti mani.

Em i singaut strong tu olsem nesenel gavman mas oraitim ol pepa bilong Lae Siti Kaunsil long kisim komisin bilong ol yet. Dispela bai givim ol pawa long ronim siti bilong ol yet. Nau yet, dispela em hat long wanem Ogenik Lo i no tok orait long Lae siti i kamap komisin bilong em yet.

Em i tok dispela pepa em ol bin wokim long 2006 na salim i go pinis long ol mas lukluk em na stretim.

Tasol i kam inap nau, nogat wanpela samting i kamap na em i askim ol MP bilong Morobe long Nesenel Palamen long lukluk long dispela na stretim hariap.

PNG minista askim Pasifik pipel long prea long Kwinslen

NAMBA bilong ol pipel i dai pinis long haiwara birua long Kwinslen i go het long go antap.

12-pela pipel i dai pinis, tupela moa antap long tenpela i kam inap long moning, na 51 arapela i lus yet.

Na nau yet, ol i askim Pasifik Ailan komyuniti long Australia long prea long ol pipel i bungim bikpela hevi long haiwara birua long Kwinslen.

Revren Leva Pat, wanpela Papua Niugini minista husat i save kodinetim ol maltikalsarel sios kongrigesen bilong Yunaiting Sios long Kwinslen, i tok planti long ol Pasifik Ailan pipel long Kwinslen i save stap long kapitel Brisben, em i no yet kisim bikpela

bagarap long haiwara olsem ol narapela hap bilong stet.

Tasol em i tok sampela Pasifik Ailan komyuniti i bungim hevi long disasta, na ol i wari long wanem samting bai kamap sapos ol haiwara i bagarapim Brisben.

Namel long ol em foapela Papua Niugini yut husat i bin kam daun long Brisben aninit long Yunaiting Sios.

Ol i bin kirap nogut long lukim traipela wara em klostu i pasim rot bilong ol long go bek long Papua Niugini.

Revren Leva Pat i tok, ol i bin mekim olgeta samting ol i ken long ol dispela yut long go bek long PNG.

Sik kolera i bin go antap moa

NAMBA bilong ol pipel long PNG husat i bin kisim sik kolera long taim bilong Krismas holide long biktaun Pot Mosbi i bin go antap.

ABC niusman long PNG, Liam Fox i ripot olsem ol helt atoriti i bin tokaut olsem samting olsem 295 i bin sik nogut tru wantaim sik kolera long Pot Mosbi long mun i go pinis.

I kam inap nau, ol i gat narapela 138. Wanpela

man i bin dai bihainim ol bikpela sik long bel bilong en long wik i go pinis.

Man husat i go pas long kolera tas fos long siti, Dokta Timothy Pyakalyia, i tok ol i ting planti ren i bin pundaun long siti na tu planti pipel i bin bung bung lont taim bilong holide, i bin mekim dispela sik stat yet long mun Epril taim ol i bin lukim nambawan keis bilong dispela sik.



KLOSTU PINIS NAU. Ol wokman bilong HG Quarries(Home Guard), i amamas wantaim Gavana Parkop taim gavana taim em, i bin go raun na lukim wok bilong ol long dispela bikpela wara wel long 14 mile autsait tasol long Pot Mosbi. Poto Nicky Bernard.

K65, 000 bilong Kamkumung

Bustin Anzu i raitim

LAS WIK Sande long Ples Kamkumung, Memba bilong Nawaeb na Minista bilong Fores Timothy Bonga i mekim ol manmeri i amamas na krai wantaim.

Ol i krai long wanem, em i kam bek long ples mama karim em, pikinini Ahi na lida man na ol i amamas long wanem, em givim han long wokim haus lotu bilong ol.

Bonga i go long dispela ples we i gat moa long 1000 kongregesen bilong Santu Gaius Luteran Sios na givim K25, 000 bilong stretim haus lotu.

Dispela haus lotu em ol i bin wokim long 1980 tasol insait long las 30 yia, namba bilong kongregesen i go antap na tu, haus i olupela na i no luk gutpela.

Bonga i tok em i amamas long ples we mama i bin karim em na givim dispela ol mani.

"Mi amamas long kam bek long dispela ples, we mama i bin karim mi long en. Mi no sem long tok olsem mi bilong Ahi. Olsem na mi givim mani K25, 000 long wok bilong Bikipela," em i tok long Ples Kamkumung taim em i givim dispela mani.

Long wankain taim tu, narapela mangi Kamkumung na siaman bilong Sentral Saplai na Tendas Bot Brian Kimmins, tu i putim K5, 000, mani bilong em yet long dispela wok bilong sios. Bungim wantaim namba bilong wokim haus lotu em K30, 000.

Bonga i givim narapela K20, 000 long wok bilong ol mama Geamsao na narapela K15, 000 long wokim Komyuniti Hall, bilong ol yangpela.

Long taim nesenel palamen i sindaun na tingting long makim nupela Gavana Jeneral bilong kantri na tu, oposisen i tingting long rausim gavman long vot i nogat bilip, Bonga i lusim Pot Mosbi na stap long asples bilong em long mekim wok bilong ilektoret bilong em long wok bilong em.

"Mi luksave long wok bilong sios na wok bilong ol mama Geamsao, olsem na mi wokim dispela komitmen. Mipela i ken bung wantaim long mekim wok bilong Bikipela," em i tok.

Em i tok tu olsem planti ol senis i



BONGA I KAM:Hon. Bonga (name) Kimmins (raithan) and Ahi LLG Presiden David Agi i go insait long Ples Kamkumung long lotu.

wok long kamap insait long Lae siti na ol mas wok wantaim long lukim ol dispela senis i wok long kamap. Ol i noken stap bilong ol yet.

Siaman bilong Sios Ristoresen Komiti, Moses Aisen, i tok ol manmeri long ples i amamas long hanmak bilong memba bilong ol. Nogat wanpela memba bilong ol i mekim dispela kain komitmen na dispela em namba wan taim ol i lukim dispela na ol i tok tenkyu long memba.

Lida bilong Ples Kamkumung Joe Ruben i mekim wan kain nek bilong Aisen na em i namba wan taim Bonga i go bek long ples mama i karim em olsem wanpela Memba bilong Palamen. Na ol i gat bikipela amamas long Bonga wantaim mani bilong haus lotu, mama Geamsao na haus bilong ol yut.

Silas Kissing, husat i go pas long lukim olsem ol i mas senisim dispela haus lotu, i tok wok bilong mekim o stretim haus lotu em planti tumas tasol em i sapot bilong ol bilip manmeri bilong Kamkumung na mekim dispela wok.

Dispela haus lotu em ol lapun bilong Ples Kamkumung i bin wokim long 1980. Long dispela taim, wanpela kapenta bilong wanpela saina man bilong Lae, Peter Wan, i givim i go long ol Kamkumung long



Butibam na Kamkumung kaikai:Bonga i amamas long kisim dispela presen bilong ol lain Butibam na Kamkumung.

Ol Poto: Bustin Anzu

wokim dispela haus lotu.

Long dispela taim, ol i bin nogat mani tasol ol lapun man, ol yet i bungim mani na dispela kapenta i wokim bilong ol.

Wan i givim dispela helpim long wanem, papa bilong en Wan, em long taim bilong Wol Woa II, ol Kamkumung i kisim em i go long hetwara bilong Busu na haitim em.

Taim pait i pinis, ol i rausim em i go aut. Na Peter i tingim dispela histori bilong papa bilong em na wokim dispela komitmen long givim dispela kapenta long helpim

ol long haus lotu bilong ol.

Tasol insait long 30-yia, namba bilong ol kongregesen i go antap na tu, haus lotu igo olupela na bikipela tingting bilong senisim haus lotu bai go het klostu taim.

Ol manmeri bilong Kamkumung Ples na Butibam i pasim tupela pik wantaim gaden kaikai na givim i go long Bonga olsem tok amamas bilong ol long em olsem wanpela bikman bilong ples na tu, lida na memba bilong nesenel palamen.



BONGA GIVIM SEK:Bonga (seken rait) i givim sek mani K25, 000 igo long ol hetman meri bilong Kamkumung. Presiden bilong Ahi LLG David Agi (raithan) i sanap witnessim.

Saut Si Evangelikal Sios bai kamapim yut konfrens long Kimbe

SAUT Si Evangelikel Sios (SSEC) long Papua Niugini bai holim yut konfrens, bilong ol long Gavuvu Niu Laip Senta, Kimbe Wes Nu Briten Provins long dispela wik.

Gospel Vaibresen musik ben bilong Solomon Ailans i stap pinis long Kimbe pilai musik long amamasim ol yut na kisim gut nius bilong Jisas

Krais i go long ol manmeri yusim musik. Konferens bai stat long 13 Jenueri, i go pinis long sande 16 Jenueri long Gavuvu Niu Laip Senta, Kimbe.

Samting olsem 5,000 yangpela manmeri bilong SSEC sios, arapela sios long Kimbe na Papua Niugini i putim nem long kamap long dispela bung. Mausman bilong ol yang-

pela manmeri long SSEC sios long Niugini Ailan, Paul Arogy, i tok olsem dispela em i namba wan taim long SSEC sios long holim kain bung olsem long Papua Niugini.

Mista Arogy i tok ol Gospel singsing man bilong Solomon Ailans, Mista Baea na Mista Mc Peterson bilong Vaibresen Gospel singsing grup bai pilai musik, singsing ol naispela

gospel musik long autim gutnius bilong Jisas Krais long senisim pasin bilong ol long kamap gutpela manmeri long ol komyuniti bilong ol.

Em i singaut i go long ol manmeri long Kimbe long kamap long dispela bung long harim gutpela toktok long kirapim gutpela sindaun bilong ol long famili na komyuniti bilong ol.

Kaikai na eksasais i skelim pikinini sapos i patpela o nogat ...Patpela pikinini i bikpela helt hevi

KAIKAI na pilai o eksasais em tupela bikpela samting we i skelim hevi (weight) na gro bilong pikinini, ol helt ripot i tok.

Dispela toktok i kamap bihainim ol ripot olsem planti pikinini long Amerika (United States of America) i patpela tumas wantaim mak bilong wanpela namel long ol pikinini long Amerika i patpela tumas.

Ripot i tok long tude, planti pikinini i no save go aut na pilai, tasol ol i save lukim televisen na pilaim kompyuta gem.

Olsem na ol i save sindaun nating na i no go aut na pilai long lusim ol kaikai na gris samting ol i kisim long em.

Ripot i tok ol patpela pikinini i ken bungim ol hevi na sik olsem bikpela gris, blutbpresa o ron bilong blut i stap antap tumas, sik long lewa tai mol i yangpela yet, sik suga, hevi long bun na sik long skin olsem ol bukuk we tuhat i kamapim, ol skin grille na ol narapela moa.

Ripot i tok ol pikinini i nogat helt hevi tumas, tasol taim ol i patpela tumas, em i narapela stori na ol bai kisim ol kain sik hariap. Yu, ol bai gat moa wari, sori pasin na ol bai tingting daunim ol yet.

Ripot i tok tru, long planti taim, sapos wanpela memba long famili bilong yu i patpela, pikinini bai kisim. Tasol nogat wokabout o pilai, kaikaim ol kaikai i no helti na bungim ol dispela wantaim em pikinini i kamap patpela.

Long tok olsem sik i mekim pikinini o man i gro patpela i no tru tasol dispela i ken kamap taim ol samting long bodi i kontrolim gro bilong man i senis.

Sik kolera i go strong yet long nupela yia...Wanpela moa i dai long NCD

SIK kolera i no wok long go daun, tasol i go strong yet taim yumi kalap long namba tu wik bilong nupela yia.

I kam inap aste, wanpela moa bikpela man i dai long Nesenel Kapitel Distrik na dispela i kisim mak long pipel i dai long sik kolera taim sik i bin stat long mun Epril las yia i go long 5-pela daiman.

I kam inap aste moning, NCD i lukim 138 pipel i kisim sik kolera na kisim helpim long haus sik long dispela mun (Janueri) tasol, Siaman bilong NCD Kolera Kontrol Yunit, Dokta Timothy Pyakalya i tok.

Em i tok stat yet long sik kolera i bin kamap long Mosbi

siti las yia, 1,436 pipel bilong NCD na Sentrel provins i bin slip long Kolera Tritmen Senta, Pot Mosbi Jenerel Haus sik na Sen John's haus sik long Gerehu na kisim marasin.

Dokta Pyakalya i tok sik kolera i stap nau long 24 ples insait long Mosbi siti na dispela i min olsem, em i stap long olgeta hap bilong siti.

Em i tok olsem sik kolera inap long kilim dai planti moa pipel, tasol bikpela na gutpela wok bilong ol nes, dokta na woklain bilong kolera tritmen yunit na ol botol wara i bin helpim long sevim planti laip.

Em i tok long medikol sait, wok i ron gut tasol hajjin bi-

long ol man we ol i no bihainim gut wanem samting ol i kisim we na ol i kaikaim, wasim han wantaim sop bihain long yusim toilet, bipo long kaikai, noken larim ol lang i holim kaikai, skelim gut ol kuk kaikai bipo yu baim na kaikaim long ol maket na strit i wok long mekim sik i go strong yet na bagarapim moa bikpela man meri.

Dokta Pyakalya i tok em i samting bilong wari taim ol bikpela man i go het long kisim dispela sik taim ol i sapos long bihainim gut hajjin na i no go daun long sik kolera.

Long wankain taim, 5-pela pipel i bin dai long Mailu

Ailan, Abau Distrik long Sentrel provins long Krismas na Nu Yia taim.

Ol ripot i tok 44 pipel i bin kisim nogut sik kolera na ol bin go slip long haus sik. Ol bin kisim moa marasin long Kupiano i go long Mailu we sik i bin kisim nogut pipel long Krismas na Nu Yia taim.

Bogia Distrik long Madang provins em narapela ples we sik kolera i bungim ol pipel long en.

Long ol ripot, Bogia Helt Senta i wok long givim marasin long 44 pipel wantaim sik kolera taim long Usino-Bundi, tupela pipel i dai na narapela tripela i kisim marasin i stap.



SEKIM: Opisa bilong Wol Visen i sekim blut bilong ol mama long Koki long sik suga we i kamap olsem wanpela bikpela laipstail sik long kantri. Fail Poto



YUMI na HIV WANTAIM Fr Jude Ronayne Forde OFM

Korapsen

KORAPSEN i stap insait long kantri na planti ol kogenaísesen i wok long sevim na helpim ol grasrut na ol turangu i save lusim helpim mani bilong ol. Stilim mani em rong na em i wanpela sinpasin. Bai i gat kot long graun na long heven long manmeri i mekim dispela pasin nogut.

Wanpela bikpela stori i bin kamap long ol niuspepa long mun i go pinis. Stori i tok long korapsen i stap bikpela tru insait long ol gavman dipatmen na ol i mas stretim hariap nau. Stori i kolim nem bilong sampela man na ol i tok ol dispela man i go pas bilong stretim dispela stilpasin i wok long bagarapim kantri. Taim mi ritim nem bilong ol man, mi lap nogut tru, bikos nem bilong wanpela man i stap. Em yet i save go pas long mekim dispela pasin nogut. Planti ol ogenaísesen i kisim hevi long stilpasin bilong em. Bai mi stori long dispela man, bai yumi kolim "Franko".

Dispela man, Franko, ol holim bikpela namba tru long wok insait long gavman. Sapos yu bungim em, bai yu ting yu lukim wanpela gutpela man tru. Em i marit man wantaim naispela famili. Em i man bilong lotu na em i salim ol pikinini i go long gutpela skul. Na i tru, i luk olsem Franko em i wanpela gutpela man i save wok hat tru na lukautim gut famili bilong em. Tasol pasin em i mekim i narakain. Pasin korapsen bilong em i save wok olsem.

Sampela ol i aplai long sampela helpim ("Grant mani") long wokim wanpela projek long skul o haus sik o ples, o narakain samting. Yumi kolim nating lain i aplai: "Helpim Grasrut Senta" (HGS). Gavman i skelim askim bilong HGS na givim tok orait long askim bilong ol.

Franko i ringim HGS long telepon na tokim ol, ol i win na bai ol i kisim dispela "Grant-mani", em olsem K100,000.00. Bihain Franko i ring bek gen na tokim HGS em nidim K1,000.00 bilong

stretim ol pepa samting ("paper work") bilong redim sek-mani long ol. Ol lain bikong HGS i save dispela askim i no stret tasol ol i tingting K100,000.00 na givim dispela mani long Franko.

Sampela wik i go pinis, Franko i ring gen na i tokim em ol i laikim K2,000.00 moa. Bod bilong HGS i bung gen ol i pilim olsem samting i no stret na Franko i gridi nau. Tingting bilongol i paul nau. Sapos ol i tok nogat bai ol i lusim K1,000.00 na nogut lol i usim K100,000.00 wantaim. Sapos ol i ripot long polis, bai polis tok: "Yupela rong long givim em dispela mani pastaim. Asua bilong yupela!" Orait, ol i givim Franko K2,000.00 moa. Nau man i go long Franko em K3,000.00.

Sampela wik i go pinis na Franko i ring gen. Em tok em laikim las K5,000.00 bilong stretim ol samting. Em i tok long las askim bilong em nau, na bihain bai ol i kisim sek K100,000.00 kwiktait. Franko i askim ol long dipositim mani long Benk Akaunt bilong meri bilong em. Na em i

givim namba bilong Benk Akaunt bilong meri em bai ol i ken salim mani.

Bod bilong HGS i bung gen na ol i tok inap nau! Ol i tokim Franko nogat! Franko tu i tok nogat! Ol i no kisim K100,000.00 "Grant-mani" na HGS i lus long K3,000.00 tu. Franko i win! "Helpim Grasrut Senta" (HGS) i lus olgeta!

Franko i stap yet na kontrolim ol sek-mani i go aut long gavman. Em wokim wankain trik long planti ogenaísesen, tasol nau plant i save long pasin bilong em na ol i no trastim em. Komyuniti inap mekim wanem nau? Ol HGS na arapela ogenaísesen i ken go long polis. Ol i gat ol telepon rekot na Benk Akaun namba na wankain stori. Ating tu polis i kisim pinis sampela ripot nogut long Franko? Ol gutpela manmeri mas sanap na paitim korapsen. Sapos nogat bai dispela lain nogut i kontrolim yumi.

I gat planti ol arapela pasin nogut ol Franko – lain i save wokim. Olsem askim long 10%

kes-mani bipo ol i givim sek-mani long wanem manmeri na organaísesen. Narapela trik em long bihain yu raitim nem long buk bilong soim yu kisim sek pinisol i askim yu long kisim sek i kam bek bikos ol i laik stretim ol samtingna ol bai giivm nupela sek long yu. Trik em dispela: Yu raitim nem pinis olsem yu kisim sek pinis. Na sapos yu gfiivm sek bek long ol, bai ol i paulim mani long yu bipo yu kisim bek gen. Na i gat planti arapela kain trik ol i save wokim.

Yu givim stilman mani, em bai stilim moa mani. Gavman dipatmen, ol bikpela lokol gavman tu i bagarap long ol dispela kain pasin nogut. i klia ol niuspepa i save pinis long raskol pasin bilong man mi kolim "Franko". Ol Mosbi lain i save long yu nau. i no longtaim bai yu wantaim meri bilong yu i go slip long kalabus long Bomana. Ol gutpela manmeri i mas sanap na paitim korapsen. Sapos nogat, bai ol dispela lain nogut i kontrolim yumi.



Deputy Chief Magistrate Iova Geita (blupela siot) wantaim ol memba bilong First Rainbow Scouts husat i go raun long opis bilong em.

Ol Renbo Skaut i skruim wok patna na tilim ol sekta kalenda

OL YANGPELA skul pikinini long Renbo insait long Nesenel Kapitil Distrik i stap nau long skul malolo husat i memba bilong Renbo Skauts Asosiesen i skruim wok patna wantaim Lo na Jastis Sekta long ol komyuniti wok long dispela nupela yia.

Wok we ol samting olsem 30 yangpela pikinini mangi na pikinini meri Renbo Skaut Asosiesen i karimaut nau em long tilim na kisim i go long ol opis bilong Lo na Jastis Sekta long ol Sekta opis na ol skul, ol 2011 Wol Plena

Deputi Sif Mejistret, Iova Geita, taim em i kisim ol kalenda i tok em i amamas stret long lukim dispela i kamap long namba wan wik bilong wok long nupela yia.

“Mi amamas stret long lukim ol dispela ol yangpela Skaut pikinini i mekim dispela kain wok olsem bikos em i gutpela stat long ol,” Mista Geita i tok.

Em i tok skulim ol pikinini taim ol i yangpela olsem em i gutpela skul we ol pikinini i kisim gutpela lainim long kamap ol gutpela manmeri bihain taim.

Midia sapot opisa, Arab Kirio i tok olsem em i amamas long wok bilong tilim na kisim ol kalenda i go aut i wok long go gut moa long dispela yia skelim wantaim las yia.

“Ol bin prinim ol kalenda pastaim na ol i kisim i go long ol opis long taim stret bilong em,” Mista Kirio i tok.

Ol i kisim ol dispela kalenda i go long Palamen Haus, opis bilong Gavana Jenerel na Nesenel Kapitil Distrik Komisin opis.

Laspela long ol em ol bai kisim ol kalenda i go long patna bilong Lo na Jastis Sekta na olgeta skul insait long Mosbi siti.

Ol i salim i go aut pinis moa long 1000 kalenda i go aut long ol sekta ejensi, polis stesen na haus kalabus long kantri taim ol i bin givim aut i go long Mosbi siti.

Fes Renbo Skaut em i wanpela Skaut asosiesen i wok long gro hariap insait long NCD/Sentrel na em i gat moa long 30 memba.

Nogat senis long skul fi mak long dispela yia

WANTAIM tripela wik i stap long stat bilong 2011 skul yia, ol papamama na sumatin iwok long redi nau long baim ol skul fi bilong ol pikinini na ol i ken go hetim skul bilong ol i go long narapela level long dispela yia.

Tasol gutpela nius em bai nogat senis long skul fi mak long olgeta level bilong ol skul long dispela yia na bai stap wankain olsem long las yia.

Nesenel Edukesen long las yia, i bin wokim disisen bihainim wanpela wok painimaut i soim ol hevi ol papamama i bungim long sot long mani bikos pe bilong ol samting i go antap na mani ol i kisim i no inap. Na hevi i bikpela moa long ol lain i stap long ol ruel eria bikos long planti hap, ol i no kisim ol gavman sevis. Tu, komyuniti i gat hevi, planti komitmen tumas na ol dispela i kamapim hevi long ol famili na seving na olsem, ol bungim hevi long peim skul fi long ol pikinini bilong ol.

Olsem na skul fi mak we ol skul i lukim na makim ol skul fi mak bilong ol i go olsem long ol Praimeri, Vokesenel, Sekonderi/NHS na FODE:

Praimeri long Gret 3-6 : K230
Gret 7-8: K230

Sekonderi /Vokesenel Gret 7-8 long ol sumatin i slip long skul : K1,100.00 na K750 long sumatin i slip long ples

na go long skul.

Sekonderi/Vokesenel level em K800 long ol Gret 11-12 sumatin i slip long ples na go skul taim ol boda o lain i slip long skul long i peim K1,300.00.

Skul fi mak bilong ol Praimeri Tisas Kolis na PNG Edukesen Institut o PNGEI fi em Opis bilong Haia Edukesen (OHE) i makim long en.

Ol Diploma long Tising (Praimeri) sumatin we HECAS i sponsaim i peim K1,257.00.

Diploma long Vokesenel na Edukesen na Trening (DOVET) sumatin i slip long skul (Boda) na i peim skul fi em yet (Self Sponsa) em bai peim K4,500.00. Ol de sumatin bai peim K2,635.00.

Ol Teknikel na Bisnis Kolis sumatin bai peim ol skul fi mak olsem:

Long sindaun long 22 wik Diploma Teknisen kos, skul fi em K2,180.00.

Long 44 wik kos, skul fi mak em K4, 600.00 we ol PETT/TTC Diploma kos ol self sponsa na HECAS sponsa sumatin wantaim i peim.

Long sindaun long 10-pela wik Bridging Kos, skul fi em K1,170.00.

Long ol aprentis i go long skruim kos long 8-pela wik, fi em K1,050.00

Long ol pat taim na spesel kos, ol i no tokaut long fi tasol hamas wok i stap insait long dispela kos bai makim mak bilong skul fi.

Toksave tu olsem ol kolis bai sasim K300.00 etministretiv fi long ol 44 wik kos.

Ol dispela ol skul fi mak we Nesenel Edukesen Bot (NRB) i sasim i bilong givim stia long ol Provinsel Edukesen atoriti na ol Edukesen Divisen bilong putim ol skul fi mak we ol papamama Inap long peim na long wankain taim, lukim olsem dispela manimak bai helpim skul i ron mekim wok inap long pinis bilong skul yia.

Olsem toksave i save gon aut olgeta yia long ol edukesen atoriti, em i wok bilong ol papamama na ol gadien wantaim ol skul gavaning bodi, ol edukesen ejensi, provinsel na nesenel gavman long serim kos bilong edukesen bilong ol pikinini. Na ol papamama i mas sevim mani nau na kam stat bilong skul yia 2011, ol bai gat inap mani.

Stat yet long las yia, ol elementeri skul level i nogat skul fi, tasol ol i go long skul fri.

Edukesen Dipatmen i mekim olsem long inapim gol bilong Yunivesel Besik Edukesen we PNG i mas inapim kam yia 2015.



SKUL LONG KATERETS AILAN: Maski ol Katerets Ailan grup long Otonomes rijen bilong Bogenvil i stap long hevi, laip na wok i go olsem tasol olgeta de, olsem ol dispela skul sumatin husat bai redi gen long statim 2011 skul yia bihain long tripela wik. Fail Poto

Intanet bai helpim gut Arawa Hai skul

ARAWA Hai skul long Otonomes Bogenvil rijen bai kisim gut helpim long sait bilong komyunikesen, intanet na lainim na tok tenkyu i go long Telikom Foundesen we i bin givim tupela wailes telepon na modem long skul.

Maski hei long Bogenil i pinis nau na i nogat pait, Arawa Hai skul i wok long kamap orait na skul i gat strongpela tingting long apgretim and skruim ol sevis i go long ol sumatin na tisa long nupela komyunikesen teknoloji.

Long las yia Disemba, Telikom i bin lonsim wailes netwok long rijen. Na long skul i kisim ol intenet modem em i histori bikos dispela em i namba wan taim long skul i kisim helpim long sait bilong intanet bilong helpim lainim na skul bilong ol tisa na sumatin.

Deputi hetmasta bilong Arawa Hai skul, Andrew Lasna taim em i kisim ol intanet modem na ol narapela samting moa long helpim komyunikesen long skul i

bin autim bikpela tok amamas bikos nau wailes netwok i stap na dispela bai helpim skul long ol wok na lainim bilong ol tisa na sumatin. Tu, skul i laik apgret i go long sekonderi level neks yia 2012 na dispela nupela teknoloji long komyunikesen bai helpim gut stret long dispela tingting bilong ol i kamap tru.

Mista Lasna i tok moa olsem yusim intanet long tising na lainim i samting we ol skul i mas gat long dispela 21st senseria na em bin autim bikpela tok tenkyu i go long Telikom Foundesen long givim dispela helpim wantaim ol intanet modem na wailes telepon i go long skul.

Arawa Hai skul i gat moa long 1,000 sumatin husat i wokim Gret 9 na 10. Na ol kam long Sentrel Bogenvil na tu, long ol narapela hap bilong Bogenvil.

Nau, skul i wok long bildim gen ol klasrum na ol narapela skul bilding we i bin bagarap long taim bilong hevi.

OLritaia UC Dikon kisim salens

SALENS i go long ol Yunaitet Sios (UC) dikon insait long Eben Rijen husat i malo long wok bilong ol long skruim yet wok bilong ol long sios long ol narapela rot.

Mak olsem 16-pela UC dikon na ol meri bilong ol long UC Eben Rijen i ritaia o pinis long wok bilong ol na long las wik Sande, ol bin holim wanpela sios sevis long Pari UC long tok tenkyu long ol dikon na ol meri bilong ol long gutpela wok ol bin mekim long planti yia.

Aninit long long bilong Eben Kaunsel, dikon bai mekim wok long 16 yia o moa bipo ol i ken ritaia. Tu, taim ol dikon i gat 60 krismas, ol i pinis long karimaut wok.

Tasol long dispela taim, planti i ritaia bihain long ol i winim 16 yia long sios sevis wok. Liklik lain tasol i abrusim 60 yia na ol i ritaia long mekim wok bilong sios.

Reveren Raka Aiga i bin go pas long spesel sios sevis long Pari na autim tok tenkyu i go long ol dikon na ol meri bilong ol long ol gutpela wok ol i mekim bilong God long planti yia.

Tasol long wankain taim, em bin troimoim salens long go het karimaut wok bilong sios long ol narapela rot. Em bin yusim



RITAIA DIKON NA OL MERI BILONG OL: Hia em ol ritaia dikon na ol meri bilong ol. Long bsksait ol man em Ranu Kiki, Taubada Nao, Frank Vagi, Lou Nou, Guba Ata, Hetau Gaudi, Boio Hekoi, Sere Guba, Ata Taina, Dika Donisi, Uea Helai, Morea Korohi, Vani Koia, Morea Dibura, Sir Isi Kevau. Long baksait em ol mer olsem Kevau Gaba, Geua Hekoi, Loa Vagi, Henao Puka, Udu Donisi, Nou Donisi. Long namel em Mase Oala, Loa Tom, Rakatani John, Isi Kevau Guba, Idau Siosi, Igua Ata, Asi Daroa na Kaia Tau. Long fran em Ledi Koriki Kevau na Helai Uda.

stori bilong olpela kar we ol i putim nupela taia long mekim ron bilong em i go het.

Bihain long sios sevis, ol sios memba na ol famili bilong ol i bin sanap long longpela lain long sekanim na tok tenkyu long ol dikon na ol meri bilong ol long gutpela wok ol

bin mekim long planti yia.

Planti i bin gat aiwara long dispela taim ol i tok gutbai na tenkyu long ol dispela lain i bin givim sevis, helpim na sapot long sios, komyuniti na famili.

Nem bilong ol dispela 16 dikon i pinis nau long karimaut wok em long Morea Dibura,

Stori na Poto: Se Isi Kevau

Morea Korohi, Guba Ata, Hetau Gaudi, Uea Helai, Sere Guba, Boio Hekoi, Frank Vagi, Vani Koia, Taubada Nao, Lou Nou, Legu Vagi (dai pinis), Ranu Kiki, Dika Donisi, Ata Taina, na Se Isi Kevau.

Winmani em i blesing bai helpim famili

WANPELA Yunaitet Sios Minista long Kaugere insait long Nesenel Kapitel Distrik bai stretim gut famili haus bilong em nau na tok tenkyu i go long Mobail kampani, Dijisel.

Long las wik Fonde, Reveren Hoge Rabura bilong Kaugere Yunaitet Sios i bin kisim toksave long Dijisel olsem em i winim K6,500 long Kes kol resis bilong em we em bin ronim long las yia mun Disemba.

Taim em i autim tok amamas bilong em long win bilong em, Reveren Rabura i tok dispela em i blesing we em na famili bilong em i wok long wetim na em i kamap nau.

"Insait long tupela yia nau, mipela famili i wok long pre olsem Papa God bai salim wanpela presen i kam long mipela long stretim famili haus bilong mipela. Mi bin save yet olsem God bai harim na bekim preis bilong mipela, tasol long taim yet bilong em. Na nau dispela rait taim i kamap," Reveren Rabura i amamas na i tok.

Reveren Rabura husat i gat 54 krismas i marit na i gat 5-pela pikinini na tupela bubu. Bikos dispela winmani i kamap klostu long bonde bi-



REVEREN WIN: Maketing Kodineta bilong Dijisel, Frank Gilum i prisanim dami sek long Kes Kol wina i sanap amamas, Reveren Hoge Rabura wantaim meri bilong en, Vagahu na bubu Loa. *Poto: Dijisel Pablik Rilesens*

long em long dispela wik, Reveren Rabura i tok e m i bikpela bonde presen, tasol em bai yusim long samting we em na famili i bin laikim long longpela taim stret.

Reveren Rabura i namba tu laki wina bilong Kes Kol promosen resis bilong Dijisel na em i bin winim jekpot prais taim em i bin ansaim win kol long 6.pm taim em i ansaim olsem "Selebretim Krismas wantaim Dijisel."

"Mi kirap nogut long harim olsem mi win tasol mi laik

givim bikpela tok tenkyu i go long Papa God i mekim win i kamap".

Em i tok em bin gat bikpela bilip olsem em inap win long wanem, em bin redi tasol long ansaim Selebretim Krismas wantaim Dijisel" long husat man em i nogat rekot bilong em long mobail telepon bilong em i ringim em.

"Mi autim bikpela tok tenyu i go long Dijisel we i mekim wok bilong salim tok i go na i kam isi stret nau na man i no inap long troimoim bikpela mani

olsem lon g ol taim bipo. Pastaim, mi bai wokabaut i go longpela rot long kisim toktok i go aut, tasol nau wantaim Dijisel, em isi bikos mi yusim mobail telepon long salim toktok," Reveren Rabura i tok.

Sif eksekutiv opisa bilong Dijisel em, John Mangos, taim em i tok amamas long Reveren Rabura long win bilong em na rot we em bai yusim mani long em i karim gutpela kaikai, i bin tok tenkyu tu i go long ol Dijisel kastoma long go insait long dispela promosen. Dijisel i bin givim i go aut long ol wina samting olsem K2, 600 na narapela manimak olsem K22, 000 olsem ol jekpot prais mani long dispela promosen. Dispela Kes kol promosen bilong Dijisel we Nau FM i bin ronim i save kamap namel ong 7.30 moning, 8.30 moning na 730 long ol wikde. Na namel long 7:30pm - 8:30pm nait long ol wikde. Dispela promosen i bin stat long Disemba 8, 2010 na pinis long nupela yia, Janueri 2, 2011.



Nu Yia Resolusen o Promis

NAU tasol yumi pinisim bikpela pestode bilong Krismas na Nu Yia. Ol stua i opim bek bisnis bilong ol. I no wankain olsem long taim bilong Krismas, klostu olgeta bikpela na liklik stua i pulap long manmeri i laik baim kai kai o presen bilong givim narapela narapela.

Long taim bilong nupela yia, plant i bin wokim promis/resolusen bilong ol. Planti i wokim promis long lusim pasin bilong spak, kai kai buai na smok, lusim paul pasin na kam bek long lotu na sindaun gut.

Wanpela mangi em i wanpela drag bodi, i save smukim mariwana o spakbrus na spak nabaut nabaut. Em i save mekim liklik wok long helpim mi olsem wasim kar, klinim ples na narapela wok moa. Em i wokim dispela wok olgeta taim. Bihain long wasim kar mi save givim em biskit, nudels o narapela liklik kai kai na drink.

Tupela de bipo long Nu Yia, mi askim em long wasim kar bilong mi. Bihain long wasim kar, mitupela i sindaun stori nating. Em i askim mi long wanpela longpela trausis na klos. Mi kirap nogut na askim em bilong wanem? Em i tok: "Mi laik senisim laip bilong em long nupela yia. Mi i laik go lotu na stap gut long yia 2011". Em i olsem wanpela tok promis o resolusen bilong em.

Mi givim em wanpela longpela trausis na wanpela gutpela klos mi save werim bipo, tasol nau em i pas tumas long mi olsem na i stap nating. Mi tokim em long traim na kisim i go long haus bilong em. Em i amamas tru bikos klos na trausis inap long em.

Long January 1, 2011, nupela yia, mi slip i stap yet. Mi harim wanpela man i singaut na pairapim kapa na narapela samting i stap klostu long rot. Mi kirap, opim windua na lukluk i go ausait. Mi bin lukim dispela yangpela man/boi mi bin givim klos na trausis long em. Em tasol i wokabaut long rot singaut singaut i stap. Wanem samting i mekim mi pilim sem, bikos em i wokabaut long as nating. Planti bikpela man i traim holim em, tasol em i strong tru. Em i spak brus na kamap strong tru.

Bikos em i hambak tumas long rot, olsem na wanpela ankel bilong em wantaim narapela strongpela man i kam na holim pasim na taitim em long rop na karim em i go na putim long haus. Resolusen bilong em i no kamap klia long namba wan de bilong nupela yia.

Mi no serim dispela long daunim em. Nogat. Em i olsem wanpela skul bilong yumi olgeta. Bilong helpim yumi long tingim gut wanem resolusen o plen yumi laik wokim dispel yia.

Dispela boi i bin lainim samting tru long wanem samting i bin kamap long em long Nu Yia de. Long 10 Januari 2011, em i kam haus bilong mi na askim mi. "Pater, yu lukim mi o nogat long Sande". Mi kirap nogut taim mem askim mi. Em i tru. Long Sande Januari 9, 2011, em i bin go lotu long Sande. Em i tokim mi olsem long Sande Januari 2, 2011, em i spak yet. Tasol nau em i lainim long rong bilong em yet. Em i bin go lotu gen. Na long wankain taim, em i kisim wanpela wok olsem sekyuriti long taun nau, em i no raun raun nating moa. Mi tokim em: "Sapos yu senisim laip bilong yu olgeta, planti blesing bai kam antap long yu gen. Nau tasol yu stat senis, wanpela blesing yu kisim pinis, yu gat wok nau. Holim na bihainim gut promis bilong yu. Em i bai givim yu planti blesing moa moa yet".

Sapotim meri Gavana Jenerel

... Meri inap mekim dispela wok

Veronica Hatutasi i raitim

LONG nau, PNG i laikim wanpela Gavana Jenerel.

Wok bilong Gavana Jenerel (GG) i olsem hetman bilong Stet o kantri long makim Kwin husat i het o bos bilong olgeta ol Komonwel kantri long wok.

Oi Komonwel kantri em ol dispela kantri we pastaim, Ingran i bin lukautim inap ol i kisim independens bilong ol. Na ol narapela we i kam aninit long lukaut bilong ol bikpela kantri pastaim Ingran i bin lukautim olsem Australia, Kanada na Nu Silan. PNG i wanpela long ol.

Olgeta ol Komonwel kantri i luksave long Kwin o King olsem hetman o hetmeri

na i mas gat man i stap makim em. Dispela man o meri em long GG. Bikos nau GG bilong PNG, em Se Paulias Matane, em Palamen i no bin bihainim stretpela rot long makim em long namba tu taim long dispela posisen long mun Jun las yia, kantri nau i wok long laik painim nupela GG. Olsem long dispela wik Tunde, Palamen i bin bung na toktok long dispela samting. Oi Palamen memba bai bihainim stretpela rot nau long makim nupela GJ na long tumora (Fraide), ol bai wokim vot na bai yumi save husat i GG bilong kantri.

Long resis bilong GG, tupela meri i sanap wantaim ol man long posisen bilong GG.

Wanpela em long Winnie Kipa, meri i

bin holim wok long opis bilong hamas praim minista bilong PNG long planti yia. Tasol em bin ritaia o pinis long wok na nau em i redi long salens bilong wok GG.

Narapela em wanpela biknem meri long Morobe provins na tu long PNG. Nem bilong en em long Ennie Moaitz.

Misis Moaitz i gat bikpela nem long kantri bikos em bin wanpela long ol namba wan meri Palamenterien long PNG. Na insait long 35 yia, 5-pela meri tasol long PNG i bin stap long Palamen. Long planti yia nau, Dame Carol Kidu em wanpela meri Palamen memba tasol i stap namel long 108 palamen man.

Misis Moaitz i wanpela meri lida na i bosmeri bilong PNG Gel Gaidis Asosiesen we i givim gutpela stia long ol yangpela pikinini meri long laip, skul, wok na sindaun bilong ol.

Nau yet, foapela Palamen memba bilong Morobe em Theodore Zurecnuoc, Nawaeb MP na Fores Minista, Timothy Bonga, Makam MP Koni Iguan na Tewai Siassi MP, Vincent Michaels i sapotim em. Tasol em i mas gat 15 Palamen memba long sapotim na em bai sans long sanap long ol memba i votim em.

Namel long nau na tumora, bai yumi wet tasol long husat man o meri bai kamap olsem nupela GG bilong PNG.

Tasol Misis Moaitz na Kiap em tupela long ol biknem meri i gat luksave, i ken mekim wok we i laikim tasol sapot bilong ol Palamen memba long go insait long resis bilong GG. Na husat i save, sapos wanpela long ol i win, em bai namba wan taim PNG i gat meri GG we i ken joinim Australia na ol narapela Komonwel kantri husat i gat meri olsem GG bilong ol.

Caritas givim sans long ol meri maigren

WANPELA bung bilong glasim "Pes bilong ol meri long Maigresen" o i lusim asples bilong ol na go painim gutpela laip long narapela ples o kantri i askim ol gavman long sainim, glasim na go hetim ol ki konvensen o lo i karamapim ol intanesenel humen rait agrimen na ol rijinel agrimen bilong lukautim ol rait na luksave bilong ol maigren na refuji.

Bung i kamap long kantri Senegal we i Katolik Caritas Intenesenel i bin go pas long holim we 110 pipel bilong 49 kantri long wol i bin sindaun long en. Pontifikat Kaunsel

bilong Maigrens na Travelas i bin stap tu long dispela konpres.

Long histori, ol man i save lukautim famili long sait bilong haus o ples bilong slip long en, kaikai, klos, ol narapela samting na tu sefti. Na ol i save lusim ples long painim gutpela moa laip bilong ol na famili bilong ol.

Tasol tude, maski long wanem kain as, moa meri i wok long kisim dispela ples o i nogat narapela rot tasol ol i mas mekim dispela, wanpela bung bilong ol "migrant women" o ol meri i lusim asples kantri bilong ol na i go sindaun long

narapela kantri i tok.

Bung i tok ol meri long ol kantri olsem Mali, Senegal na Sri Lanka i save go olsem na wet long Algeria, Moroko na Guatemala bipo ol i go painim gutpela sindaun long ol kantri olsem Beljam, Swiden, Amerika na Ajentina. Tasol bung i tok gen long nau taim, planti ol meri i nogat kliapela ples bilong go bikos fainol ples ol i laik wokabout i go long en i hatpela, i gat birua o kostim bikpela mani long go long en.

"Ol meri i save lusim asples na go long narapela kantri bikos ol i

ting bai ol i gat gutpela sans long painim wok long sevis sekta olsem haus gel na lukautim pikinini o ol lapun lain. Wantaim dispela wok, ol i lukautim ol famili bilong ol long ol asples, peim skul fi long ol pikinini, helt kea long ol lapun papamama na ol famili bilong ol," bosmeri bilong polisi wantaim Caritas Intanesenel, Martina Liebsch, i tok.

Mis Liebsch i tok long taim ol meri i painim ol sans i stap, ol i save bungim bagarap na hevi.

"Bikos nogat gutpela was o stia long sevis sekta long planti kantri, planti taim ol meri i save painim

hevi we ol ejensi i promisim ol wok i no karim kaikai. Na ol meri i lusim ol paspot, gat dinau long ol rikrutmen ejensi we i sasim ol bikpela fi long painim wok. Tu, ol i save repim o bagarapim ol meri na yusim ol tu olsem ol pamuk meri," Mis Liebsch i tok.

Caritas i pilim olsem i moabeta long ol gavman i praiorataisim ol lukautim rait long lukautim maigren meri na famili billong em na ol sans long sosel na ikonmik eria. Na long ol famili i lusim asples na go long narapela kantri i mas stap wantaim.

Raun Lukim ol Meri na Pikinini:



NAISPELA PRUT PULAP KAPSAIT: Olgeta taim, Buka maket i pulap i stap long ol pres prut olsem mandarim o swit muli, kukamba, popo, painapel, kumu, kulau na ol kain gaden kaikai, olsem long piksa we yangpela meri i baim i stap.



PAITIM GITA NA SINGSING: Dispela lain meri Bogenvil i soim olsem ol i ken paitim gita na singsing tu ya long wanpela Yunaitet Sios selebresen bilong ol Yunaitet Sios i bin kamap long Buka taun.



STAIL BILAS PIKININI: Dispela liklik pikinini Barakau i bin putim stail klos na selebretim kamap bilong nupela yia wantaim ol famili, hauslain nap les lain.



WOKSOP TAIM: Dispela em ol meri bilong Katerets (Carterets) Ailan, em wanpela long ol liklik ailan grup long Bogenvil, i wok long bungim bikpela hevi long solwara i karim. Ol i sindaun long wanpela woksop long kisim save long ol samting ol i ken mekim long lukautim gut laip na sindaun bilong ol na ol famili na komyuniti long dispela taim bilong hevi.



TOK PISIN NEWS
from Radio Australia

radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Fiji Pacific Sun na Trenspot Wokas Yunion i stretim belhevi

OL toktok i wok long go het namel long menesmen bilong Fiji kampani i save ronim ol domestic na rijenal balus sevis long kantri, Pacific Sun, na Trenspot Wokas Yunion, bilong stretim sampela belhevi.

Fijilive i ripot olsem, ol dispela toktok i bilong stretim wari bilong 85 wokman na meri husat bai ol i nogat moa wok sampela taim dispela mun, sapos kampani i kamapim sampela senis long wok.

Jeneral Menesa bilong Pacific Sun, Jim Samson, i bin tokim FijiLive olsem, menesmen i wok long toktok yet wantaim ol wokman, na tu, wantaim ol yunion bilong ol.

Em i tok Air Pacific bai kamapim 29 nupela wok, na ol i askim ol wokman na meri em ristaksa bai rausim wok bilong ol, long aplai long ol dispela nupela wok.

Pacific Sun i bin wok long lusim samting olsem 6 milian dola long wan wan yia insait long dispela tripela yia bihain.

Tupela ganman i kilim wan- pela Australia long Cambodia

WANPELA man Australia, krismas bilong em 43 bilong ples Viktoria, i dai pinis long Phnom Penh, kapitel bilong Kambodia, bihain long tupela man i sutim em wantaim gan na kilim em i dai.

Mausman bilong polis long Kambodia, Jeneral Cheath Chantharith, i tok dispela trabel i bin kamap las wik Sarere nait taim dispela man i laik sek in long Phnom Penh hotel.

Ol opisal long Australia Embasi long Phnom Pen, i wok long wok klostu wantaim ol lokol atoriti long painimaut moa long dispela trabel.

Australia Dipatmen bilong Foren Afes na Tred, i tok Australia Embasi long Phnom Penh na Dipatmen bilong Foren Afes long Kanbera i wok long givim ol kain helpim long famili bilong dispela man.

Saina i helpim long dau- nim bel kros long Korea

DIFENS Sekreteri bilong Yunaitet Stets, Robert Gates, i tok Saina (China) i bin helpim long daunim ol belkros long Korea Peninsula, bihain long Not Korea i bin sutim wanpela Saut Korea ailan long wanpela roket bom i no long taim i go pinis.

Long toktok bilong em pastaim long em bai go long Beijing, Sekreteri Gates i bin tok US i luksave olsem Saina i mekim gupela wok bilong daunim ol belkros long Korea long pinis bilong yia i go pinis.

Taim em i holim tripela miting long Saina, em i tok em i tingting long toktok wantaim ol top opisal long we ol i ken helpim Not Korea long bel isi liklik, na maski long laikim pait oltaim.

Wanpela kampani bai kotim Commonwealth



**HAIWARA I
PAINIM
IPSWICH:** Hia
poto i soim hai-
wara i go insait
long bik rok
bilong liklik taun
long Ipswich long
Brisbane
Australia.

Games komiti

WANPELA saun kampani bilong Australia i tok em i laikim Delhi Komonwel Gems Ogenaising Komiti long India long baim moa long wan milian dola long wanem ol i no bin salim kwik ol saun masin bilong ol i lusim India.

Norwest Sound, i wanpela long tripela Australia prodaksen kampani husat i tok Delhi Komonwel Gems Ogenaising Komiti, i no baim ol yet planti milian dola long ol wok em ol i bin mekim long mun Oktoba 2010 taim ol i bin holim Komonwel Gems long India.

Ol i ting olsem samting olsem narapela 15 intanesenel kampani bai bung na kisim Delhi Komonwel Gems Ogenaising Komiti i go long kot.

Wanpela papa bilong Norwest Sound Kampani, Chris Kennedy, i tok em i save olsem ol masin na ol narapela samting bilong en bai kamap long Sidni long Mande, taosl em bai go het yet long mekim Delhi Komonwel Gems Ogenaising Komiti long baim kampani bilong en.

Em i tok olsem ol dispela masin em i mas kam bek long taim yet bikos i gat ol arapela wok bilong ol long taim bilong krismas na ol skul festival.

Kennedy i tok sapos ol i skelim mak bilong pe bilong wan wan de ol dispela masin bai wok na i no mekim wok, em ol i lusim bikpela mani tru pinis.

Wanpela wokman bilong Australia Dipatmen bilong Foren Afes i tok gavman i wok long toktok wantaim gavman bilong India long stretim ol dispela hevi.1

UNICEF i givim tok lukaut long Pasifik

YUNAITED Nesens Childrens Fan, em ol i save kolim long UNICEF nau i givim tok lukaut o woning i go long ol kantri long Pasifik olsem bai kisim ol planti yia long strongim gut gen ol ekonomi bilong ol bihainim dispela Global Fainensal kraisin.

Em i tok ol Pasifik kantri bai bungim hevi yet long givim kaikai i go long ol pipel bilong ol, taim mani em ol pipel i save kisim i pundaun pinis, na nogut planti pipel tu bai lusim ol wok bilong ol insait long ol dispela faipela yia i kam.

Eksektiv Dairekta bilong UNICEF long Nu Silan, Dennis McKinlay, i tok dispela wari em i wanpela bikpela hevi tru long wanem planti pipel long Pasifik i save lukluk long ol pikinini na ol famili memba bilong ol husat i save stap long ol narapela kantri long salim man ii go long ol asples bilong helpim ol famili bilong ol.

Australia kriket bosman i autim toktok long kriket

SIF Eksektiv Opisa bilong Kriket Australia, James Sutherland, i tok nogat wanpela man o samting bai stopim ol long lukluk gut long we pilai kriket i save go het long Australia.

Kriket Australia i bin tokaut long lukluk gut gen long dispela kain pilai bihain long Australia i bin lusim tripela Ashes tes agensim Ingran. Australia i bin winim tasol wanpela long ol dispela gem.

Mista Sutherland i tok bai ol i lukluk na glasmis gut olgeta lain husat i save pilai na

ol lain husat i save wok wantaim Kriket long Australia. Mista Sutherland bai stap insait tu long dispela wok riviu.

Ol i kalabusim Air India Boma

WANPELA kot long Kanada (Kenada) i kalabusim pinis man husat i bin bomim wanpela balus bilong India, long kalabus inap long nainpela yia long wanem em i bin mekim sampela giaman toktok i go long kot.

ABC niusman long Kanada, Dan Karpenchuk, i ripot olsem wanpela kot long Kanada i bin tokaut long dispela as agensim Mista Inderjit Singh Reyat.

Inderjit Singh Reyat i stap pinis long kalabus inap long 15-pela yia long wanem em i bin mekim ol bom em ol i bin pairap long Narita ples balus long Tokyo, Japan, na tu, bagarap Air India balus namba 182 long mun Jun 1985, arere long ol nambis bilong Ireland long Yurop.

Ol i bin sasim em tu long giamanim kot taim kot i bin wok long harim keis bilong tupela poroman bilong en husat i bin redim ol tingting na wok bilong kamapim ol dispela bom, em ol i bin bomim Air India long en.

Bihain kot i bin rausim keis bilong dispela tupela fren bilong Mista Reyat, tasol kot i bin sasim em long wanem planti taim em i bin giamanim kot.

Wanpela long ol giaman toktok bilong en em olsem em i no bin save long nem bilong wanpela man husat em i bin wok wantaim bilong mekim ol dispela bom, maski sapos dispela man i bin stap long haus bilong Reyat long sampela de.

Pacific BEAT

4, 5, 6am & 4pm, 5pm
including sport

Listen to Radio Australia
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



Nogat rot long vot nogat bilip

SORI tumas, luk olsem Oposisen bai no inap kamapim dispela vot i nogat bilip we ol wok long toktok planti na driman long en.

Bikos Gavman i soim stret ol i sanap strong wantaim we namba olsem 67 bin kamap long palamen long Tunde.

Vot nogat bilip long Gavman mas gat mak olsem 55 memba long kamapim dispela tasol i luk olsem bai i nogat nau.

Maski papa billong ol Sir Michael Somare i no stap long go pas long ol boi bilong em, ol boi bilong e mi soim olsem ol i no inap surik o seksek nabaut.

Oposisen i no tokaut tu long wanem as na ol i no putim ripot o pepa bilong ol long kamapim vot nogat bilip go long tebol bilong Spika. Olsem na Spika i no lukim wanpela kain pepa olsem ya na em askim long surukim Palamen long Fraide tumora long ol ken bung gen. Tasol



dispela bung em bilong makim tasol Gavana Jenerel bilong Papua Niugini.

Sapos Gavman i strongim namba bilong ol na kamapim wanpela Gavana Jenerel long tumoro, em soim tu piksa olsem namba na strong bilong Gavman i strong na ol ken ranim palamen na kantri go inap long 2012.

Em soim tu olsem maski Praim Minista Sir Michael Somare i no stap, ol ken go het yet na ranim Gavman na kantri.

Ating Somare mas stap bihain tu long stiaim ol boi bilong em long wanem kain eksen ol i mas mekim na bihainim taim palamen bin kam bung long Tunde long dispela wik. Olsem na ol i mekim samting stret na kam

aut long palamen wantaim amamas na wanbel. O ating ol saveman na edvaisa bilong Gavman tu i stiaim ol memba gut tru long wanem kain rot na pasin ol mas mekim long floa bilong palamen long Tunde dispela wik.

Ating sapos Oposisen bin traिम dispela vot nogat bilip long Palamen long Tunde, mi ting ol no inap winim bikos sanap wantaim na strong bilong Gavman sait em ples klia tru. Ol no bruk maski Somare i makim memba bilong Wabeg Sam Abal olsem namba tu Praim Minista na daunim memba bilong Kandep Don Polye. Em tupela man Enga yet ya. Husat tok tupela bai gat bel nogut long narapela narapela long dispela samting.

Ating olgeta memba tu i amamas long stap yet long Gavman bikos ol kisim gutpela mani long mekim ol wok long distrik bilong ol. Gavman i oraitim tu long apim pei bilong olgeta memba na dispela em wan-

pela bikpela samting we ol i amamas long en. Olsem na Oposisen bai tok wanem long dispela.

Sapos yu laik man i laikim yu na pren gut wantaim yu, orait yu mas givim samting we ol i ken amamas long en na apim nem bilong ol na mekim yu pren tru bilong em.

Somare i ken kisim bel isi na kisim malolo bihainim oda bilong Sief Jastis long em mas stap ausait inap kot bilong em long Lidasip Traibunel i kamap. Em orait bikos ol boi i mekim gutpela wok na bos i ken kisim amamas long dispela.

Olgeta bikpela projek bilong Gavman we i kamap na stap bai go het yet bikos Gavman i sanap strong na ol bai karimaut olgeta projek na program bilong Gavman long dispela yia na mekim ol i karim kaikai. Bikpela projek olsem LNG na ol bikpela rot insait long kantri we Gavman i laik kamapim nau.

WANTOK KOMENTRI

'Pe mi laikim, bai mi yet kisim long laik'

PASIN bilong bihainim stretpela pasin bilong mekim wok, em i wanpela samting we i no save strong moa insait long wok laip tude.

Insait long olgeta opis, i gat planti wokmanmeri nau i wok long mekim wok inap long skul ol i ken kisim long mekim dispela wok, na wanem ol rot ol i ken bihainim long abrusim, kalapim, ol banis lukaut bilong wok na stilim mani bilong gavman o bisnis.

Dispela wik, Wantok Niuspepa i kisim sampela ol pepa i soim sampela krangi wok mani insait long Papua Niugini Difens Fos.

Ol dispela pepa i soim olsem ol sinia bosman insait long dipatmen bilong difens i wok long skelim bikpela hap mani tru namel long em yet, brata bilong em, na wanpela arapela poroman bilong ol.

Sapos man i holim wok olsem sekreteri bilong wanpela dipatmen bilong gavman, em bai hat moa long em i tanim het o pasim ai long ol rot i stap bilong kisim moa mani sapos em i laikim.

Planti bikmanmeri i tokaut pinis long niuspepa, redio na televisen. Dispela samting nogut ol i kolim 'korapsen', em i no samting bilong ol bosmanmeri tasol. Nogat. Em i ken kamap long olgeta level bilong wok gavman, na olgeta wok bisnis. Long tok inglis, bai ol i tok em i 'systemic' pinis.

Em i go insait long olgeta level bilong gavman, na nau em i kamap pasin bilong ol pinis long mekim.

I gat planti gutpela tingting manmeri i stap, husat i ken lidim dispela senis long kamap long pasin na tingting bilong olgeta ol pipel bilong yumi.

Gutpela tingting na wok pasin em i samting we i mas bihainim tru bel bilong ol wokmanmeri bilong yumi.

Sapos dispela tingting i ken strong i go moa long olgeta opis bilong gavman, ating bai yumi lukim olsem bai nogat planti pasin stil i kamap.

WANTOK

Published Weekly, Thursday, for Word Publishing Company, Ltd.
P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia
52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager
Elizabeth Konga

Editor
Neville Choi

Published at
Section 58, Allotment 3
Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Ltd and are set out full on the display advertising form.



Ol taitwara i go antap yet long Brisben
OL KAR i ron brukim haiwara i karamapim wanpela rot long Milton, wanpela sabeb long Brisben long Tunde dispela wik.

Ples bagarap WANPELA man i sanap lukluk long ples em i stap long en i bagarap long haiwara taim ren i pundaun na bagarapim ples.



Taitwara mak i wok go antap moa
BRISBEN Riva i kapsait i go bihainim rot bilong wilwil bihainim sait bilong em long Coronation Drive, Milton, taim bikpela ren moa i wok pundaun long Janueri 11.



Taitwara mak i wok go antap moa
BRISBEN Riva i kapsait i go bihainim rot bilong wilwil bihainim sait bilong em long Coronation Drive, Milton, taim bikpela ren moa i wok pundaun long Janueri 11.



Haiwara brukim haus
WANPELA bilding i klostu pundaun nau bihain long bikpela strongpela haiwara i ron i kam na brukim wanpela sait bilong dispela haus long Mande dispela wik.

Wara i surik i kam long steps bilong Suncorp Stadium
WARA i wok isi isi kamap long steps bilong Suncorp Stadium long Brisben long Trinde.

